


ISABEL GARCÍA-RODEJA GAYOSO, SECRETARIA XERAL DA UNIVERSIDADE DE SANTIAGO DE COMPOSTELA,

CERTIFICA, antes da aprobación da acta correspondente, que o Consello de Goberno da USC, na súa sesión do día vinte e un de decembro de dous mil nove, aprobou o Regulamento de adscrición funcional a efectos de docencia das materias das titulacións de máster a departamentos e áreas de coñecemento.

E para que así conste, asino a presente certificación, en Santiago de Compostela, a vinte e un de decembro de dous mil nove, co Visto e Prace do Sr. Reitor.

O Reitor



Senén Barro Ameneiro



REGULAMENTO DE ADSCRICIÓN FUNCIONAL A EFECTOS DE DOCENCIA DAS MATERIAS DAS TITULACIÓN DE MÁSTER A DEPARTAMENTOS E ÁREAS DE COÑECEMENTO NA UNIVERSIDADE DE SANTIAGO DE COMPOSTELA

Preámbulo

O Real Decreto 1393/2007, de 29 de outubro, establece a ordenación das ensinanzas universitarias oficiais, de acordo cos principios establecidos pola Lei 4/2007 do 12 de abril pola que se modifica a Lei Orgánica Universitaria (LOMLOU). Este RD establece no artigo 3 que corresponde ás universidades a elaboración dos plans de estudo, de acordo coas normas e requisitos que sexan de aplicación. Estes plans de estudo deberán ser verificados polo Consello de Universidades e autorizados para a súa implantación pola correspondente Comunidade Autónoma, tal e como indica a LOMLOU. Os títulos que se obteñan pola superación destes plans de estudo deberán ser inscritos no Rexistro de Universidades Centros e Títulos (RUCT).

De acordo co citado RD 1393/2007, nas titulacións adaptadas ao EEES non hai un catálogo de títulos aprobado polo Goberno ao que deben suxeitarse as universidades para a elaboración dos seus plans de estudo, nin tampouco directrices comúns propias de cada título, como ocorre nas actuais titulacións elaboradas consonte ao RD 1497/1987 do 27 de novembro, polo que se establecen as directrices xerais comúns dos plans de estudo.

Os novos plans de estudo dos títulos de Máster son verificados polos órganos correspondentes e acreditados para o correspondente rexistro no RUCT sen vinculación das materias e/ou módulos ás áreas de coñecemento, sendo esta unha competencia exclusiva de cada universidade. Só coa asignación do encargo docente da materia aos profesores e ás profesoras se concreta esta vinculación polo que, co obxecto de corrixir esta situación, é necesario unha adscrición previa da materia á área de coñecemento, así como establecer os mecanismos que permitan formular esta adscrición.

Así, no novo marco legal, as adscricións entre as distintas materias e as áreas de coñecemento deben considerarse como unha ferramenta funcional e flexible cara á organización da docencia e o profesorado universitario, nun contexto de racionalidade no que se conxuguen parámetros de planificación do cadro de persoal do PDI e de ordenación do proceso de ensino/aprendizaxe (ordenación académica) inherentes.

A estes efectos, o Decreto 28/2004 do 22 de xaneiro (D.O.G. nº 27, do 9 de febreiro de 2004), polo que se aproban os Estatutos da Universidade de

Santiago de Compostela, establece, no artigo 82, apartado c), que corresponde ao Consello de Goberno a aprobación dos plans de estudo logo do informe da comisión correspondente do Claustro. De acordo coas liñas xerais establecidas pola Comisión de Titulacións do Claustro, os centros, departamentos e institutos universitarios poderán desenvolver másteres oficiais (entendendo por "centros" exclusivamente os seguintes: facultades e escolas, centros de investigación e un centro que se ocupe dos estudos de posgrao oficial). Asemade, cada máster oficial deberá ter unha Comisión Académica, da que formará parte o responsable do Centro, Departamento ou Instituto que asuma a dirección académica, e un dos seus membros fará as funcións de Coordinador/a, e actuará en representación do máster.

De acordo con todo o anterior, o Consello de Goberno da Universidade de Santiago de Compostela na súa sesión do día 21 de decembro de 2009 acorda aprobar este *Regulamento de Adscrición Funcional a efectos de Docencia das Materias das Titulacións de Máster a Departamentos e Áreas de Coñecemento*.

Artigo 1. Sobre a adscrición das materias de Máster a áreas de coñecemento

a) Todas as materias das titulacións de Máster deberán estar adscritas como mínimo a unha área de coñecemento e como máximo a tres, escollidas de entre as constituídas na Universidade de Santiago de Compostela, que se consideren adecuadas científica e académicamente a efectos de poder responsabilizarse da súa docencia.

b) A relación das áreas que teñan adscrita unha materia será priorizada, asignando os coeficientes de afinidade 3, 2 e 1, en función da súa adecuación académica para impartir a súa docencia.

c) Unha materia poderá propoñerse que estea adscrita a máis de tres áreas de coñecemento, sempre que se acompañe a proposta de adscrición cunha argumentación razoada que a sustente.

d) A adscrición funcional a efectos de docencia das materias nos títulos de Máster será tomada como referencia para a asignación efectiva de encargo de docencia que recollerá explicitamente a Programación Académica Anual (P.A.A.).

Artigo 2.- Procedemento de adscrición de materias de Máster a áreas de coñecemento

a) A Vicerreitoría con competencias en organización docente, solicitará aos Directores dos Departamentos que formulen unha proposta inicial, aprobada polo seu Consello de Departamento, coas materias dos Másteres para cuxa docencia se postulan as áreas de coñecemento que

o constitúen. Na elaboración da proposta os Departamentos deberán ter en conta as razóns académicas e científicas da adecuación entre os contidos da materia e os propios da área.

b) O resultado do requirimento anterior, para cada Máster, será sometido a informe da Comisión Académica responsable do mesmo. O Coordinador ou a coordinadora do Máster remitirá á Vicerreitoría con competencias en organización académica o informe, aprobado pola Comisión Académica, no que se pronunciarán razoadamente sobre os seguintes puntos relativos a cada materia do Máster correspondente:

- Posible supresión dalgunha área reclamante de adscrición da materia ou inclusión doutras, co fin de dar cumprimento ao punto a) do artigo 1.
- Proposta dos valores de afinidade para cada unha das áreas finalmente propostas para a adscrición da materia.

c) As propostas das áreas, departamentos e comisións académicas estarán baseadas na información dispoñible recollida nas memorias dos títulos, nos encargos de docencia dos últimos cursos e nas táboas de afinidades entre áreas. Mais concretamente, os criterios de referencia que deberán ter en conta para formular as súas propostas son prioritariamente os seguintes:

- Afinidade dos contidos da materia coa área de coñecemento, tendo en conta as actividades docentes, investigadoras, de transferencia de coñecemento e, de ser o caso, experiencia clínica.
- Historia previa da docencia de materias análogas ou afíns dos plans de estudo das titulacións de primeiro e segundo ciclo, Grao ou Máster na USC ou noutras universidades.
- Calquera outro estudo, informe ou referencia que sirva para xustificar a adecuación da área para impartir contidos da materia de acordo coa metodoloxía de ensino-aprendizaxe aprobada no correspondente plan de estudos.

d) A Vicerreitoría con competencias en organización docente analizará as propostas das Comisións Académicas dos Másteres e valorará a aplicación racional dos criterios establecidos neste Regulamento, podendo solicitar os informes e o asesoramento de expertos que considere convenientes.

e) De ser o caso, para aquelas materias para as que non exista pronunciamento en relación á adscrición por parte das áreas de coñecemento ou centros, ou as argumentacións non sexan estimadas como suficientes, corresponderá á Vicerreitoría con competencias en

organización docente formular de oficio unha proposta de adscrición así como o establecemento das correspondentes afinidades.

f) Coas modificacións que se teñan considerado necesarias, a Vicerreitoría elaborará unha proposta definitiva de adscrición que, previa exposición pública, negociación sindical e informe da COAP, será sometida á aprobación do Consello de Goberno.

Disposición adicional

No caso de másteres interuniversitarios, só se adscribirán as materias cuxa docencia, de acordo co plan de estudos e o convenio correspondente, corresponda á Universidade de Santiago de Compostela.